

# JA NØKY MIDI JA JUDAS YJAAY

**Ku ja Judas tñijayi pøn  
jaty ja Dios tø twi'ixy**

<sup>1</sup>Judas'ajtp øts. Øts ja Jacob nmiga'ax'ajtpy. Nmidumpy øts ja nwindson'ajtim Jesucristo jøts meets ya'at nøky ndanijayi pøn jaty ja Dios tø tyamidsøkyiyi jøts ja yja'atiyit, ku ja tø y'agø'dukiyi y'axajtukiyi ja nwindson'ajtim Jesucristo, ku ja møøt y'etti. <sup>2</sup>Mbaattip yikxon ja Dios kyunuu'kxin jøts øy tsuj mba'ayowiyidit jøts ja øy'ajtin myikmo'odit.

**Pøn nugo jawindaay'atwamp**

<sup>3</sup>Meets migu'uktøjk, o meets ja nøky kawinaak øjk tø njadanijayiwy'añ sa dø'øn y'ejxi tyiyi ja nitso'ok'ajtin midi njagyejpyindip, ixyamts mee nnijayi jøts tu'ugyi xyik'ettit ja mjanchja'win midi ja Dios tu'ugyi tø xmø'øyim, ku ja xja'ajtyindi. <sup>4</sup>Jabi tøxi ja jaa'y jam tmidøki ja win'øø'nin jøts meets ja mdukpadunwa'añidi midi ja tiy'ajtin kyamøøt. Pø wampxi ja Dios kyajpxy jøts ja tyik'ayo'ombaaatt sam pyaat'atyiyi ku ja kya'øyjaa'y'atti, wändipts

ja' øy ja ti ttu'undit maa'kxukidip ja Dios ja'. Ka'ap ja Dios Teety yja' ttsojkidi pøn xja'ajtindip møøt ja nwindson'ajtim Jesucristo.

<sup>5</sup>O meets ja xjanijawi, nduknijawiywampy meets ja jadigojk jøts ku ja Dios Teety ojts tyik'awa'atspidsimy ja Israelit jaa'y jam Egipto, xjats tyikwindigøy ja' pøn ja kamibøjkiyi kabaduujniyi. <sup>6</sup>Jøts nayide'en ja ankilistøjk winaagin ja yja' ka' t'ukpadunidi sam pyaat'atyi, Diosts ja tø myachi jøts ja tø pyikta'agyi agoostujpy, jam ja y'awejxti ku ja tiidyu'unin mye'ent. <sup>7</sup>Nayide'ents ja yjajtmidi ja Sodoma kajp jøts Gomorra kajp, jøts midi jaty jam kajp wingon ejttøø. Øy sa y'adøtstøø, yaa'dyøjk namyøøt'ajtidip tukyaa'dyøjk, tø'øxyøjk namyøøt'ajtidip tuktø'øxyøjk. Jade'ents ja ka'øybi ttundøø. Jøts ja Dios xemikøjxp tø yik'ayo'ombaaadyidi ma xemikøjxp tyøy. Jade'ents yø xuk'ijxyimp xuknija'wimp jøts ka'ap jade'en n'adøøjtsint.

<sup>8</sup>Øyi tjanijawidi pøn meets ixyam nugo mwin'øø'nip, kyø'øm winmaa'njønpy ja jade'en ttundi ku ja kya'øyjaa'y'atti jøts ka' tmøjpikta'akti ja Dios kyutujk.

Nugo twindsøy ja ankilistøjk midi ja Dios myøøtsinaapy. <sup>9</sup>Janch wenk idø'on ja Dios yø'øbi jaa'y twindsowdi, nika'ap ja møj ankilis Miguel twindsøøy ja miku' jade'en ne'egi, ku ja Moises ñine'kx tyiktsepajtidi sudso dø'on ja yiktu'unt. Ne'egi yide'eñi ja'ayi tñimaay, "Dios paat'ajtiyip pøni sa ja mdunwa'añi." <sup>10</sup>Yø jaa'y midi mwìn'øø'nidip ku yø ti kø'øm tkaja'gyukidi, ja'ats yø kyajpxtip ka'øy; ja'ayi nugo ñija'widip jøts yø jade'en y'adø'øtstit ejxim jiyujkin, kø'ømts yø nugo jade'en ñankwyindigøydi.

<sup>11</sup>Ayo'ombaattip ja'adi ku nay ja' tpadundi sam ja Cain yjaa'y'ajty ku ja myigu'uk ja tyik'ø'jky. Tundip nayide'en sam ja Balaam jøts ja meen patp tjawidi. Jade'en nøjcx wyindigøydi sam ja Coré ku y'ookøxti ku ja Dios tmidsepøjktøø. <sup>12</sup>Nugo mdsø'ødyuñidi meets ma mee mgaadyi m'uukti tukpabøjkpitøjck, ku meets yø ka'ap mnimiñidi amumjoojt, jøts ku yø nugo ku'uxyi kyaydi y'uukti jøts yø jade'en nugo mdaxi'ikyidi, niti windsø'jkin tkabikta'akti, kø'øm ja ne'egi ñay'ejx'ityidi, ka'ap ja t'ixy pøni ti ja tø yiktaguwanidi. Jade'en ja'adi ejxim ja yoots n'ejxint midi ka' tyu'uy, jøts nayide'en ejxim tu'uk ja tsā'amguipy midi katøømip, øy ja tyøøm'ajtin ja tjapaaty, windigøy y'ejtnidipts ja jadi'iñi. <sup>13</sup>Tum ja ka'øybi tyundip jøts ne'egi o sa tyimy'adø'øtswa'andi tsø'ødyumbim. Jade'ents tø tyuul'tigøødyi jøts xemikøjxp jap y'ettit agoostujpy.

<sup>14</sup>Ja møjjaa'y Enoc pøn myiwixujk najtskaxi, ku ja Adan jawyeen,

ja' ja Dios kyugajpxy'ajt jøts yide'en tñigajpxy ja ka'øy jaa'y, jøts wyaañ: "Jøts ø n'ijxy ja nwindson'ajtim ku ja mil'ampy tmøøtmiñ ja pyabøjkpitøjck, <sup>15</sup>jøts pøky pyayø'øwya'añ pøn ka'øyjaa'y'ajttip, pøn tø tyundigøydi kyajpxigøydi jøts ku tø twindsowdi ja nwindson'ajtim." <sup>16</sup>Yø'øbi jaa'y nugo ña'amdi nugo pyagajpxti, ja y'øy'ajtin yø nugo yjayiktunwandip jøts ja jaa'y øy tsuj nadyijyi tñigajpxti ja'agøjxp ku nugo tkajpxwyetswa'andi.

**Ku ja pabøjkpitøjck  
yiktukmadøy sa yjaa'y'attit**

<sup>17</sup>Meets migu'uktøjck, ja'myatsti sa ja nwindson'ajtim Jesucristo kyudanaabyi mdukmadoojidøø <sup>18</sup>ku wyandøø yide'en: "Ku wyingøñ jøts ja nwindson'ajtim mye'ent jats kyaxø'øktit ja jaa'y pøn tka'ødyejtip tka'øgyajpxtip ja Dios yja'. Ka'øyjaa'y'ajttip ja' jade'en sa ja kø'øm ñadyamidsøkyidi." <sup>19</sup>Yø' nugo tyikwinmaa'nmya'atwamp ja jaa'y; ja'ayi chojktip ja kya'øybi jøts ka'ap Espíritu Santo ja tmøøt'atti.

<sup>20</sup>Meets migu'uktøjkti, tu'ugyi mnabyikta'agidit jøts tu'ugyi xyik'ettit ja mjanchja'win midi ja Dios yajkpy. Ku ja Dios x'ajot'attit, ja Espíritu Santo mbudøkiyidip. <sup>21</sup>Xtsojkindip ja Dios, xpa'ayo'owindip ja Dios, paty øyim mnay'ejx'etidit sam ja ttsøkyin. Njøp'ejx'ejtindip ku ja nwindson'ajtim Jesucristo xmø'øyint ja øy'ajtin midi xemikøjxp.

<sup>22</sup>Yikjotkujk'atti ja' pøn pyamaapy pyadajpy pøni midi'ibi

pyabøkp. <sup>23</sup>Tuu'mo'odi kajpxwejt  
 ku tyundigøydi jøts ka'ap ja  
 ayo'on tpaattit; jøts xpa'ayo'ot  
 nayide'en pøn ka'øyjaa'dyi, øyim  
 mnay'ejx'etidit kø'øm, jøts ka'ap  
 jade'en xu'undit sam ja'adi.

**Ku ja Judas tkajxa'aky ja Dios**  
**jøts tyikjøpkijxy ja ñøky**  
<sup>24-25</sup>Tu'uk ja Dios møj, pøn  
 tnija'wip, pøn xyiknitso'ok'ajtimp,

ja'ats ja myøk'ajtin xa'ejx'ejtimp  
 jøts ka' ndundigø'øyint,  
 jade'en'ampyts agujk jotkujk  
 xukwinguwa'jka'ant ja' wyindump,  
 ku niti pøky ngamøøt'ajtint. Ja'ats  
 tmøøt'ajtp ja øy'ajtin ja møk'ajtin  
 nwindøn'ajtim Jesucristo køjxp,  
 jaayip ku ja tyiktso'ondakijxy  
 tuki'iyi, jøts kunim ja nayide'en  
 tyikjøpkøxt. Jade'en idø'on ja y'ejxi  
 tyiyi.